

venuta di 4 nave state in armada, vien a disarmar, qualle è sora porto, *videlicet* la Zustignana de sier Beneto, la Malipiera, el belingier di Pexari, et una altra. Dicono el zeneral esser levato di la Zefalonia, e venuto a Corfù con le galie sotil, et havia dà licentia a le galie di Alexandria et Baruto, venissen a disarmar. Restava sier Pangrati Zustignan et sier Carlo Valier, con do galie grosse, et sier Nicolò Pasqualigo, et uno altro governador li al Zafalonia, a levar le anime di la isola volevano venir via, et quelle meterle al Zante. *Item*, sier Tomà Zen, el cavalier, havia auto licentia dal zeneral, e veniva in questa terra; et li do provedadori di l'armata erano partiti, uno a la volta di Cataro, l'altro a Durazo; et che quelli di la Zefalonia, di l'ixola, à volesto dar a' nostri ducati 4000 da pagar stratioti, et non si dovessero levar e abandonar l'impresa. *Item*, sier Marco Oriò era stà ferito in la faza di una piera, e con la nave, di la qual è capetanio, venuto versso el Zante. *Item*, che nostri, hessendo a campo a la Zefalonia, feno 4 collonelli, *videlicet* schiavoni e albanesi, spagnoli, francesi et italiani, con questo hordine, el primo havesse la terra, che li fusse dato ducati 2000, et il loco a sacho; et *tamen* nulla feno contra la prodeza di turchi, che non erano in tutto nel castello...

Or, di tal levata dil zeneral fo gran mormoration in la terra. Era stà perso tanto tempo, e fata tanta spexa con tutta l'armata a una bichocho, si pol dir, e non l'aver ottenuta. Et il zeneral fo molto biasmato et quelli governadori fono mandati, e fo ditto mal di sier Francesco Zigogna, provedador di la Morea. *Post* fo colegio col principe a consultar.

57* In questa matina, veneno in colegio li creditor dil bancho di Garzoni, dolendossi assai, dimandando di haver li libri, et hessendo contraversia con li piezi di banco nuovo, la Signoria li disseno, li libri erano in l'avogaria, e fazino tre capi dil bancho vecchio, et tre dil bancho nuovo. Et cussi andono al bancho, qual fu averto; et *dicitur*, trovono in una cassa ducati 400. *Item*, sier Andrea di Garzoni era in li Frari menori. Fo ditto Zuan Batista, suo fiol, esser ito a Roma, e Agustin a Mantoa, e haver partito tra l'horo ducati 14 milia; *tamen* non fo vero. Et poi disnar, se reduseno a San Zane Pollo li creditor dil banco vecchio, et feno tre capi: sier Hironimo Grimani, *quondam* sier Bernardo, sier Zuan da cha' Taiapiera, *quondam* sier Alvixe, et sier Batista Morexini, *quondam* sier Carlo; et dil banco nuovo: sier Domenego Zorzi, *quondam* sier Francesco, sier Marin Grimani, *quondam* sier Piero, et sier Piero Marzello, *quondam*

sier Giacomo, *quondam* sier Piero. Et li primi dil bancho vecchio, tutti tre refudono, come dirò qui soto.

A dì 18 marzo. Se intese, el signor Lodovico esser partito di Novara, e venuto a Vegevene col campo. Et in questo zorno in questa terra comenzò a piover, che era tre mexi non havia piovesto, et era gram sicità in la terra *etc.*

Noto, sier Andrea Michiel, provedador in Albania, per hordine dil conseio di X, fo mandato ai Redoni a far quella terra ai Covrili; et fo mandato Marin di Greci et altri a fabricarla.

In questa matina, fu fato la cria, che li creditor dil bancho a San Zane Pollo si dovessero ozi redur; et cussi reduti, elexeno cai dil bancho vecchio sier Alvixe Contarini, *quondam* sier Giacomo, sier Christofal Soranzo, *quondam* sier Beneto, et sier Alvixe Liom, de sier Giacomo.

Et *etiam* fu fato la cria in Rialto, li piezi dil bancho nuovo si reduga in chiesa di San Zuanne di Rialto, a far li cai di piezi; et elexeno sier Piero Barbo, *quondam* sier Nicolò, sier Alvise Zustignan, *quondam* sier Marco, et sier Piero Contarini, *quondam* sier Zuane.

Noto, li Marchoni, boni citadini, *etiam* faliteno, e tolseno la fida per dueati 25 milia, sì che la terra à di gran strete.

In questa matina, in do quarantie civil fo expedito il caso, et la sententia fata al zudegà di procuratori, di li procuratori con li Bernardi, per certa possession di un da cha' Dandolo. Parlò per i procuratori sier Zuan Antonio Minio. Rispose sier Alvise Zorzi. Or la dita sententia fo taià: una non sincera, 17 di no, 27 taià in favor di...

Da poi disnar, fo conseio di X con zonta di colegio, et poi l'horo elexeno provedadori di li castelli di Corfù, con ducati 25 al mexe, sier Nicolò Corner, fo governador a Monopoli, *quondam* sier Antonio, et sier Marco Antonio Contarini, di sier Priamo, molto amato e pratico a Corfù. Fu soto sier Marco Zen, fo camerlengo di comun, *quondam* sier Piero; et il Corner refudoe.

Da Trevi, di sier Piero Marzello, provedador zeneral di 16. Come eri, si ha per letere dil conte Alvixe Avogaro, comparseno su la riva di Adda, a l'incontro di Rivolta, cercha 100 provisionati, con li qual scaramuzono li stratioti erano a la guardia di quel loco, e certi fanti; e quelli, ritraendosi, cerchavano condurli in arguaito; ma, scoperto, comparseno cavali 150 lizieri in zerecha, fra li qualli era qualche homo d'arme, et provisionati 500 ben armati, e fono a le man con li nostri. Fo feriti alcuni di l'una